

七十二家集

陳思王集卷之六

魏陳思王曹植子建著

表

慶文帝受禪表

陛下以聖德龍飛順天革命允答神符誕作民
主乃祖先后積德累仁世濟其美以暨於先王
勤恤民隱劬勞戮力以除其害經營四方不遑
啟處是用隆茲福慶光啟于魏陛下承統贊成
前緒克廣德音綏靜內外紹先周之舊跡襲文

武之懿德保大定功海內爲一豈不休哉

慶受禪上禮表

陛下以明聖之德受天顯命良辰卽祚以臨天下
洪化宣流洋溢宇內是以普天率土莫不承
風欣慶執贄奔走奉賀闕下况臣親體至戚懷
歡踊躍

龍見賀表

臣聞鳳凰復見於鄴南黃龍雙出於清泉聖德
至理以致嘉瑞將棲鳳於林囿豢龍於陂池爲
百姓旦夕之所觀

初封汝鄉侯表

臣抱罪卽道憂惶恐怖不知刑罪當所限齊陛下哀愍臣身不聽有司所執待之過厚卽日於廷津受安鄉侯印綬奉詔之日且懼且悲懼於不脩始違憲法悲於不慎速此貶退上增陛下垂念下遺太后見憂臣自知罪深責重受恩無量精魄飛散忘軀殞命

封甄城王謝表

臣愚驚垢穢才質疵下過受陛下日月之恩不能摧身碎首以答陛下厚德而狂悖發露始于天憲自分放棄抱罪終身苟貪視息無復瞻幸不悟聖恩爵以非望枯木生葉白骨更肉非臣罪戾所當宜蒙俯仰慙惶五內戰悸奉詔之日悲喜參至雖因拜章陳答聖恩下情未展

轉封東阿王謝表

奉詔太皇太后念雍丘下濕少桑欲轉東阿當
合王意可遣人按行知可居不奉詔之日伏增
悲喜臣以無功虛荷國恩爵尊祿厚用無益於
時脂車秣馬志在黜放不圖陛下天父之恩猥
宣皇太后慈母之念遷之陛下幸爲久長計聖
旨惻隱恩過天地臣在雍丘劬勞五年左右罷
怠居業向定園果萬株枝條始茂私情區區實
所重棄然桑田無業左右貧窮食裁糊口形有

輟露臣聞古之仁君必有棄國以爲百姓况乃
轉居沃土人從蒙福江海所流無地不潤雲雨
所加無物不茂若陛下念臣入從五年之勤少
見佐助此枯木生華白骨更肉非臣之敢望也
饑者易食寒者易衣臣之謂矣

謝妻改封陳妃表

璽書今以東阿王妃爲陳王妃并下印綬因茲
上前所假印以其拜授書以印日到臣輒奉詔
拜其才質底下謬同受私遇寵素餐臣爲其首
陛下體乾坤育物之德東海含容之大乃復隨
例顯封大國光揚章灼非臣負薪之才所宜克
當非臣穢黷所宜蒙獲夙夜憂歎念報罔極洪
施遂隆旣榮枝榦猥復正臣妃爲陳妃光耀宣
朗非妾婦蠢愚所當蒙被葵藿草物猶感恩養

況臣含氣銜珮弘惠歿而後已誠非翰墨屢辭
所能報答

謝入覲表

臣得出幽屏之城獲覲百官之美此一喜也背
茅茨之陋登闕闕之闈此二喜也必以有醜之
容瞻見穆穆之顏此三喜也將以櫛杌之質稟
受崇聖之訓此四喜也

又

不世之命非所致思有若披浮雲而覩白日出
幽谷而登喬木目希庭燎心存恭極

謝周觀表

習使周觀初玩雲盤北觀疏圃遂步九華神明
特應譎譎天然誠可謂帝室皇居者矣雖崑崙
閼風之麗文昌之居不是過也

謝明帝賜食表

近得賜御食拜表謝恩尋奉手詔愍臣瘦弱奉
詔之日涕泣橫流雖文武二帝所以愍憐於臣
不復過於明詔

明帝詔附

王顏色瘦弱何意耶腹中調和不令者食幾
許米又啖肉多少見王瘦吾甚驚宜當節水
加餐

謝賜柰表

卽夕殿中虎賁宣詔賜臣等冬柰一櫛詔賜使
溫啖夜非食時而賜見及柰以夏熟今則冬至
物以非時爲珍恩以絕口爲厚非臣等所宜荷
之

帝答詔附

山柰從涼州來道里旣遠又東來轉暖故柰
中變色不佳耳

謝鼓吹表

許以簫管之樂榮以田游之嬉陛下仁重有虞
恩過周旦濟世安宗實在聖德

答明帝詔表

奉詔所作故平原公主諫文義相秩章章殊興
句句感切

上責郭詩

臣植言臣自抱寡歸薈刻肌刻骨追思罪戾盡
分而食夜分而寢誠以天網不可重罹聖恩難
可再恃切感相鼠之篇無禮過死之義形影相
弔五情愧赧以罪棄生則違古賢夕改之勸忍
垢苟全則犯詩人胡顏之譏伏惟陛下德象天
地恩隆父母施暢春風澤如時雨是以不別荆
棘者慶雲之惠也七子均養者鴈鳩之仁也會
罪責功者明君之舉也矜愚愛能者慈父之恩

也是以愚臣徘徊於恩澤而不敢自棄者也前
奉詔書臣等絕朝心離志絕自分黃耆永無執
圭之望不圖聖詔猥垂歲召至止之日馳心輦
轂僻處西館未奉闕庭踴躍之懷瞻望反側不
勝大馬戀主之情謹拜表并獻詩二首詞旨淺
末不足採覽實露下情冒顏以聞

上下太后誄表

大行皇太后資坤元之性體載物之仁齊美姜
嫄等德任姒佐政內朝惠加四海草木荷恩含
氣受潤庶鍾元吉承育萬祚何圖一旦早棄明
朝背絕臣庶悲痛靡告臣聞銘以述德誄尚及
哀是以冒越諒闇之禮作誄一篇知不足讚揚
明貴以展臣蓼莪之思慮荒情散不足觀采

上先帝賜鑑表

先帝賜臣鑑黑光明各一領兩當鑑一領今
代以昇平兵革無事乞悉以付鑑曹自理

冬至獻襪履表

伏見舊儀國家冬至獻履貢襪所以迎福踐長
先臣或爲之頌臣旣玩其嘉藻願述朝慶千載
昌期一陽嘉節四方交泰萬景昭蘇亞歲迎祥
履衣總慶不勝感節情繫雖幄拜表奉賀并獻
紵履七量襪若干副茅茨之陋不足以入金門
登玉臺也

獻壁表

臣聞玉不隱瑕臣不隱情伏知所進非和氏之璞萬國之幣壁爲充貢

獻馮表

臣於先武皇帝世得大宛紫騮一疋形法應圖
善持頭尾教令習拜今輒已能又能行與鼓節
相應謹以表奉獻

獻牛表

臣聞物以洪珍細亦或貴故不見焦僥之微不
知泆濫之泰不見果下之乘不別龍馬之大高
下稽懸所以致觀也謹奉牛一頭不足追遵大
小之制形少有殊敢不獻上

請招降江東表

臣聞主之義永生者非徒以甘食麗服宰割萬物而已將有以補益群生尊主惠民使功存於竹帛名光於後嗣今臣文不昭於俎豆武不習於干戈而竊位藩王施祿東夏消損天日無益聖朝淮南尚有山竄之賊吳會猶有潛江之虜使戰士未獲歸於農畝五兵未得收於武庫蓋善論者不耻謝善戰者不羞走夫凌雲者泥蟠者也後伸者先屈者也是以神龍以爲德尺蠖

以昭義昔湯事葛文王事犬夷固仁者能以大
事小若陛下遣明哲之使繼能陸賈之蹤者使
之江南發愷悌之詔張日月之信聞以降路權
必奉承聖化斯不疑也

請用贊表

舊集贊表各目又請自武表今正之

昔段干木脩德於閭閻秦師爲之輟攻而文侯
以安穰苴授節於邦境燕晉爲之還師而景公
無患皆簡德尊賢之所致也願陛下垂高宗儆
嚴之明以顯中興之功

望恩表

臣聞寒者不貪尺玉而思短褐饑者不願千金而美一餐夫千金尺玉至貴而不若一餐短褐者物有所急也

請祭先王表

自計邇遠以來有踰旬日番竟夏節方到臣悲
傷有心先王公憂至日終是以家俗不以憂日
祭至于先王自可以今辰告祠臣雖卑鄙實稟
體于先王自臣雖貧窶蒙陛下厚賜足供大軍
之具臣欲祭先王于北河之上羊猪牛臣能自
辦者臣縣自有先王喜鰓臣前以表得徐州臧
霸二鰓百枚足自供事請水瓜五枚計先王崩
來未能半歲臣實欲告敬且欲復盡哀

請赴元正表

欣豫百官之美想見朝覲之禮耳存九成日想
率舞

章

改封陳王謝章

臣既弊陋守國無効自分削黜以彰衆誠不意
天恩滂霈潤澤橫流猥蒙加封茅土既優爵賞
必重非臣虛淺所宜奉受非臣灰身所能報答

封二子爲公謝恩章

詔書封臣息男苗爲高陽鄉公志爲穆鄉公臣
伏自惟文無升堂廟勝之功武無摧鋒接刃之
効天時運幸得生貴門遇以親戚少荷光寵竊
位列侯榮曜當世顧影慙形流汗反側洪恩罔
極雲雨增加旣榮本榦枝葉并蒙苗志小豎旣
頑且稚猥荷列爵竝佩金紫施崇所加惠及父
子

陳思王集卷之七

魏陳思王曹植子建著

書

與楊德祖書

植白數日不見思子爲勞想同之也僕少小好
爲文章迄至于今二十有五年矣然今世作者
可略而言也昔仲宣獨步於漢南孔璋鷹揚於
河朔偉長擅名於青土公幹振藻於海隅德璉
發跡於北魏足下高視於上京當此之縣人人

自謂握靈蛇之珠家家自謂抱荆山之玉吾王
於是說天網以該之頓八絃以掩之今悉集絃
國矣然此數子猶復不能飛騫絕跡一舉千里
也以孔璋之才不閑於辭賦而多自謂能與司
馬長卿同風譬畫虎不成反爲狗者也前有書
嘲之反作論盛道僕讚其文夫鍾期不失聽於
今稱之吾亦不能妄歎者畏後世之嗤余也世
人著述不能無病僕常好人譏彈其文有不善
者應時改定昔丁敬禮嘗作小文使僕潤飾之

僕自以才不過若人辭不爲也敬禮諸侯卿何
所疑難文之佳惡吾自得之後世誰相知定吾
文者邪吾常歎此達言以爲美談昔尼父之文
辭與人通流至於制春秋游夏之徒乃不能措
一辭過此而言不病者吾未之見也蓋有南威
之容乃可以論於淑媛有龍淵之利乃可以議
於斷割劉季緒才不能逮於作者而好詆訶文
章倚櫟利病昔田巴毀五帝罪三王咎五霸於
稷下一旦而服千人魯連一說使終身杜口劉

生之辯未若田氏今之仲連求之不難可無歎
息乎人各有好尚蘭茝蓀蕙之芳衆人之所好
而海畔有逐臭之夫咸池六莖之發衆人所共
樂而墨翟有非之之論豈可同哉今往僕少小
所著辭賦一通相與夫街談巷說必有可采擊
轅之歌有應風雅匹夫之思未易輕棄也辭賦
小道固未足以揄揚大義彰示來世也昔揚子
雲先朝執戟之臣耳猶稱壯夫不爲也吾雖薄
德位爲蕃侯猶庶幾力上國流惠下民建永

世之業流金石之功豈徒以翰墨爲勲績辭賦
爲君子哉若吾志未果吾道不行則將採庶官
之實錄辨時俗之得失定仁義之衷成一家之
言雖未能藏之於名山將以傳之於同好非要
之皓首豈以今日之論乎其言之不慙恃惠子
之知我也明早相迎書不盡懷曹植白

楊脩答臨淄侯牋附

脩死罪不侍數日若彌年載豈獨愛顧之隆
使係仰之情深耶損辱嘉命蔚矣其文誦讀

友覆雖諷雅頌不復過此若仲宣之擅江表
陳氏之跨冀域徐劉之顯青豫應生之發魏
國斯皆然矣至於脩者聽采風聲仰德不暇
目周章於省覽何惶駭於高視哉伏惟君侯
少長貴盛體發旦之賢有聖善之教遠近觀
者徒謂能宣昭懿德光贊大業而已不謂復
能兼覽傳記留思文章今乃舍王超陳度越
數子觀者駭視而拭目聽者傾首而聳耳非
夫體通性達受之自然其孰能至於此乎又

嘗觀見執事握牘持筆有所造作若成誦在心借書於手曾不斯須少留思慮仲尼日月無得踰焉脩之仰望殆如此矣是以對鵲而辭作暑賦彌日而不獻見西施之容歸憎其貌者也伏想執事不知其然猥受顧錫教使刊定春秋之成莫能損益呂氏淮南字值千金然而弟子掛口市人拱手者賢聖卓犖固所以殊絕凡庸也今之賦頌古詩之流不更孔公風雅無別耳脩家子雲老不曉事彊著

一書悔其少作若此仲山周旦之徒則爲皆有
僭乎君侯忘聖賢之顯迹述鄙宗之過言竊以爲
未之思也若乃不忘經國之大美流千載之英聲
銘功景鐘書名竹帛此自雅量素所蓄也豈與文
章相妨害哉輒受所惠竊備矇瞍歌誦而已敢望
惠施以秦莊氏季緒璅璅何足以云反咎造次不
能宣備脩死罪死罪

與吳質書

植白季重足下前日雖因常調得爲密坐雖燕
飲彌日其於別遠會稀猶不盡其妙積也若夫
觴酌陵波於前簫笳發音於後足下鷹揚其體
鳳觀虎視謂蕭曹不足儔衛霍不足侔也左顧
右盼謂若無人豈非君子壯志哉過屠門而大
嚼雖不得肉貴且快意當斯之時願舉泰山以
爲肉傾東海以爲酒伐雲夢之竹以爲笛斬泗
濱之梓以爲箏食若填巨壑飲若灌漏卮其樂

固難量豈非大丈夫之樂哉然日不我與曜靈
急節面有逸景之速別有參商之濶思欲抑六
龍之首頓羲和之轡折若木之華閉滌汜之谷
天路高邈良無由緣懷戀反側如何如何得所
來訊文采委曲譬若春榮瀏若清風申詠反覆
曠若復面其諸賢所著文章想還所治復申詠
之也可令意事小史諷而誦之夫文章之難非
獨今也古之君子猶亦病諸家有千里驥而不
珍焉人懷盈尺和氏而無貴矣夫君子而不知

音樂古之達論謂之通而蔽墨墨不好伎何爲
過朝歌而廻車乎足下好伎而正值墨氏廻車
之縣想足下助我張目也又聞足下在彼自有
佳政夫求而不得者日有之矣未有不求而自
得者也且改轍易行非良樂之御易民而治非
楚鄭之政願足下勉之而已矣適對嘉賓口授
不悉往來數相聞曹植白

吳質答東阿王書附

質白信到奉所惠貺發函伸紙是何文采之

巨麗而慰喻之綢繆乎夫登東嶽者然後知
衆山之邈迤也奉至尊者然後知百里之卑
微也自旋之初伏念五六日至于旬時精散
思越惘若有失非敢羨龍光之休慕猗頓之
富也誠以身賤犬馬德輕鴻毛至乃歷玄闕
排金門升玉堂伏虛檻於前殿臨曲池而行
觴旣威儀虧替言辭漏滌雖特平原養士之
懿愧無毛遂燿穎之才深蒙薛公折節之禮
而無馮諼三窟之效屢獲信陵虛左之德又

無侯生可述之美凡此數者乃實之所以積
積於胸臆懷眷而惜邑者也若追前宴謂之
未究欲傾海爲酒弁山爲肴伐竹雲夢斬梓
泗濱然後極雅意盡歡情信公子之壯觀非
鄙人之所庶幾也若實之志實在所天思授
卽釋黻朝夕侍坐鑽神父之遺訓覽老氏之
要言對清醕而不酌抑嘉肴而不享使西施
出帷娛母侍側斯盛德之所蹈明哲之所保
也若乃近者之觀實蕩鄙心秦箏發徽二八

迭奏塤簫激於華屋靈鼓動於座右耳嘈嘈
而無聞情踴躍於鞍馬謂可北懾蕭韓使貢
其楛矢南震百越使獻其白雉又况權備夫
何足視乎還治諷采所著觀省英瑋實賦頌
之宗作者之師表也衆賢所述亦各有志昔
趙武過鄭七子賦詩春秋載列以爲美談質
小人也無以承命又所答貺辭醜義陋申之
再三赧然汗下此邦之人閑習辭賦三事大
夫莫不諷誦何但小史之有乎重惠苦言訓

以政事惻隱之恩形乎文是子通章而質
四年雖無德與民式歌且舞猶遷不同國以
久矣然一旅之衆不足以揚名步武之間不
足以騁跡若不改轍易御將何以效其力哉
今處此而求大功猶絆良驥之足而責以千
里之任檻猿猴之勢而望其巧捷之能者也
不勝見恤謹附遺白答不敢繁辭吳質白

與司馬仲達書

今賊徒欲保江表之城守區區之吳爾無有爭
雄於宇內角勝於平原之志也故其俗蓋以洲
渚爲營壁江淮爲城塹而已若可得挑致則吾
一旅之卒足以敵之矣蓋弋鳥者矯其矢釣魚
者理其綸此皆度彼爲慮因象設宜者也今足
下曾無矯矢理綸之謀雖欲候其離舟伺其登
陸乃圖并吳會之地收陳野之民恐非主上授
節將軍之心也

與陳琳書

夫披翠雲以爲衣戴北斗以爲冠帶虹蜺以爲
綽連日月以爲佩此服非其美也然而帝王不
服者望殊於天志絕於心矣

與丁敬禮書

頃不相聞覆相聲音亦爲怪故藥興爲書以含欣
而秉筆大笑而吐辭亦歡之極也

答崔文始書

臨江直釣不獲一鱗非江魚之不食其所餌之
者非也是以君子慎舉擢

序

前錄自序

故君子之作也儼乎若高山勃乎若浮雲質素也如秋蓬摛藻也如春葩汜乎洋洋光乎皜皜與雅頌爭流可也余少而好賦其所尚也雅好慷慨所著繁多雖觸類而作然蕪穢者衆故刪定別撰爲前錄七十八篇

柳頌序

予以閑暇駕言出遊過友人楊德祖之家視其
屋宇寥廓庭中有一柳樹聊戲刊其枝葉故著
斯文表之遺翰遂因辭勢以譏當今之士

遷都賦序

余初封平原轉出臨淄中令郅拔遂徙雍丘既
已浚儀而末將適子東阿號則六易居實三遷
連遇瘠土衣食不繼

七

七啟

昔枚乘作七發傅毅作七激張衡作七辯崔駰
作七依辭各美麗予有慕之焉遂作七啟并命
王粲作焉

玄微子隱居大荒之庭飛邈離俗澄神定靈輕
祿傲貴與物無營耽虛好靜羨此未生獨馳思
乎天雲之際無物象而能傾於是鏡機子聞而
將往說焉駕超野之駟乘追風之輿經迴漠出

幽墟入乎泱泱之野遂屆玄微子之所居其居也左激水右高岑背洞壑對芳林冠皮弁被文裘出山岫之潛穴倚峻崖而嬉游志飄飄焉羌羌焉似若挾六合而隘九州若將飛而未逝若舉翼而中流於是鏡機子攀葛藟而登距崖而立順風而稱曰予聞君子不遜俗而遺名智士不背世而滅勲今吾子棄道藝之華遺仁義之英耗精神乎虛廓廢人事之紀經譬若畫形於無象造響於無聲未之思乎何所規之不通也

玄微子俯而應之曰嘻有是言乎夫太極之初
混沌未分萬物紛錯與道俱降蓋有形必朽有
跡必窮茫茫元氣誰知其終名穢我身位累我
躬竊慕古人之所志仰老莊之遺風假靈龜以
托喻寧掉尾於塗中

鏡機子曰夫辯言之艷能使窮澤生流枯木發
榮庶感靈而激神況近在乎人情僕將爲君子
說游觀之至娛演聲色之妖靡論變化之至妙
敷道德之弘麗願聞之乎玄微子曰吾子整身

倦世探隱極沈不遠遐路幸見光臨將敬滌耳
以聽玉音

鏡機子曰芳菰精粃霜著露葵玄熊素膚肥豢
膿肌蟬翼之割割纖析微累如疊穀離若散雪
輕隨風飛刃不轉切山鷄斤鷄珠翠之珍舉芳
蓮之巢龜膾西海之飛鱗臠江東之潛鼉臠漢
南之鳴鶉糲以芳醲甘和旣醇玄冥適鹹蓐收
調辛紫蘭丹椒施和必節滋味旣殊遺芳射越
乃有春清縹酒康狄所營應化則變感氣而成

彈微則苦發扣宮則其生於是盛以翠樽酌以
離觴浮蟻鼎沸醅烈馨香可以和神可以娛腸
此肴饌之妙也子能從我而食之乎玄微子曰
予其藜藿未暇此食也

鏡機子曰步光之劒華藻繁繡飾以文犀雕以
翠綠綴以驪龍之珠錯以荆山之玉陸斷犀象
未足稱雋隨波截鴻水不漸於九旒之冕散曜
垂文華組之纓從風紛紜佩則結綠懸黎寶之
妙微符采照爛流景揚輝黼黻之服紗縠之裳

金華之鳥動趾遺光繁飾參差微鮮若霜纓佩
綢繆或彫或錯薰以幽若流芳肆布雍容閒步
周旋馳驟南威爲之解顏西施爲之巧笑此容
飾之妙也子能從我而服之乎玄微子曰予好
毛褐未暇此服也

鏡機子曰馳騁足用蕩思游獵可以娛情僕將
爲吾子駕雲龍之飛駟飾玉輅之繁纓垂宛虹
之長綏抗招搖之華旂揮忘歸之矢秉繁弱之
弓忽躡景而輕驚逸奔驥而超遺風於是礪填

谷塞榛藪平夷綠山置且彌野張罟下無漏跡
上無逸飛鳥集獸屯然後會圍獠徒雲布武騎
霧散丹旗耀野戈爰皓旰文狐掩狡兎捐鴈
鷄拂振鷺當軌見藉值足遇踐飛軒電逝獸隨
輪轉翼不暇張足不及騰動觸飛鋒舉挂輕罾
搜林索險探薄窮阻騰山赴壑風厲焱舉機不
虛發中必飲羽於是人稠網密地逼勢脇哮闕
之獸張牙奮鬣志在觸突猛氣不懼乃使北宮
東郭之儔生抽豹尾分裂羶肩形不抗手骨不

隱拳批熊碎掌拉虎摧斑野無毛類林無羽群
積獸如陵飛翮成雲於是駮鐘鳴鼓收旌弛旆
頓綱縱網罷獠回邁駿馱齊驅揚鑾飛沫俯倚
金較仰撫翠蓋雍容暇豫娛志方外此羽獵之
妙也子能從我而觀之乎玄微子曰予性樂恬
靜未暇此觀也

鏡機子曰開宮顯敞雲屋暗盱崇景山之高基
迎清風而立觀彤軒紫柱文檄華梁綺井含葩
金墀玉廂溫房則冬服絺綌清室則中夏含霜

華閣綠雲飛陞凌虛俯眺流星仰觀八隅升龍
攀而不逮眇天際而高居繁巧神怪變名異形
班輸無所措其斧斤離婁爲之失睛麗草交植
殊品詭類綠葉朱榮熙天曜日素水盈沼叢木
成林飛翻陵高鱗甲隱深於是逍遙暇豫忽若
忘歸乃使任子垂釣魏氏發機芳餌沉水輕繳
弋飛落翳雲之翔鳥援九淵之靈龜然後採菱
華擢水蘋弄蛛蟀戲鮫人諷漢廣之所詠觀蒨
女於水濱耀神景於中沚被輕縠之織羅遺芳

烈而靜步抗皓手而清歌歌曰望雲際兮有好
仇天路長兮往無由佩蘭蕙兮爲誰脩嫵婉絕
兮我心愁此宮館之妙也子能從我而居之乎
玄微子曰予耽巖室未暇此居也

鏡機子曰旣游觀中原道還開宮情放志蕩滯
樂未終亦將有本妙妓遺世越俗揚北里之
流聲紹陽阿之妙曲爾乃御文軒臨洞庭琴瑟
交揮左箎右笙鐘鼓俱振簫管齊鳴然後妓人
乃被文縠之華桂振輕綺之飄飄戴金搖之熠

耀揚翠羽之雙翹揮流芳耀飛文歷盤鼓煥續
紛長裾隨風悲歌入雲躋提若飛躡虛遠蹶陵
躍超躡蜿蜒揮霍翔爾鴻翥泚然鳬沒縱輕體
以迅赴景追形而不逮飛聲激塵依違厲響才
捷若神形難爲象於是爲歡未溲白日西頽散
樂變飾微步中閨玄眉弛兮錦華落收亂髮兮
拂蘭澤形嬌服兮揚幽若紅顏宜笑睇盼流光
時與吾子携手同行踐飛除卽閒房華燭爛幄
幕張動朱唇發清商揚羅袂振華裳九秋之夕

爲歡未央此聲色之妙也子能從我而遊之乎
玄微子曰予願清虛未暇此遊也

鏡機子曰予聞君子樂奮節以顯義烈士甘危
疆以成仁是以雄俊之徒交黨結倫重氣輕命
感分遺身故田光伏劍於北燕公叔鼎命於西
秦果毅輕斷虎步谷風威懼萬乘華夏稱雄詞
未及終而玄微子曰善鏡機子曰此乃游俠之
徒耳未足稱妙也若夫田文無忌之儔乃上古
之俊公子也皆飛仁揚義騰躍道藝遊心無方

抗志雲際陵轢諸侯驅馳當世裨六則九野生
風慷慨則氣成虹蜺吾子若當此之時能從我
而友之乎玄微子曰予亮願焉然方於大道有
累如何

鏡機子曰世有聖宰翼帝霸世同量乾坤等曜
日月玄化參神與靈合契惠澤播於黎苗威靈
振乎無外超隆平於殷周踵義皇而齊恭顯朝
惟清王道遐均民望如草我澤如春河濱無洗
耳之士喬嶽無巢居之民是以俊乂來仕觀國

之光舉不遺材進各異方讚典禮於辟雍講文
德於明堂正流俗之華訛綜孔氏之舊章散樂
移風國富民康神應休臻屢獲嘉祥故甘露紛
而晨降景星宵而舒光觀游龍於神淵聆鳴鳳
於高岡此霸道之至隆而雍熙之盛際然主上
猶尚以沈恩之末廣懼聲教之未厲采英奇於
仄陋宣皇明於巖穴此寧子商歌之秋而呂望
所以拔綸而逝也吾子爲太和之民不欲仕陶
唐之世乎於是玄微子攘袂而興曰偉哉言乎

近者吾子所述華潘欲以驚我氣覺予心至聞
天下穆清明君莅國覽盈虛之正教知頭素之
迷惑令予廓爾身輕若飛願及之服從子而歸